

資質通鑑

貴族通鑑

資治通鑑卷第一百

讀史議贊讀通鑑纂要讀史紀事本末讀史綱目讀史要略讀史彙編讀史長編讀史紀事本末讀史綱目讀史要略讀史彙編讀史長編臣司馬光奉

勅編集

晉紀二十二

起旃蒙單開盡屠維協洽凡五年

孝宗穆皇帝中之下

永和十一年春正月故仇池公楊毅弟宋奴使其姑子梁式王刺殺楊初初子國誅式王及宋奴自立為仇池公栢溫表國為鎮北將軍秦州刺史 二月秦大蝗百草無遺牛馬相噉毛

夏四月燕主雋自和龍還薊先是幽冀之人以雋為東遷互相驚擾所在屯結羣臣請討之雋曰羣小以朕東巡故相惑為亂耳今朕既至尋當自定不足討也 蘭陵太守孫黑濟北太守高柱建興太守高寔及秦河內太守王會黎陽太守韓高皆以

郡降燕

秦淮南王生幼無一目性麤暴其祖父洪嘗戲之曰

吾聞瞎兒一淚信乎生怒引佩刀自刺出血曰此亦一淚也洪

大驚鞭之生曰性耐刀槩不堪鞭捶洪謂其父健曰此兒狂悖

宜早除之不然必破人家健將殺之健弟雄止之曰兒長自應

改何可遽爾及長力舉千鈞手格猛獸走及奔馬擊刺騎射冠

絕一時獻哀太子卒彊后欲立少子晉王柳秦主健以讖文有

三羊五眼乃立生爲太子以司空平昌王菁爲太尉尚書令王

墮爲司空司隸校尉梁楞爲尚書令姚襄所部多勸襄北還

襄從之五月襄攻冠軍將軍高季於外黃會季卒襄進據許

昌六月丙子秦主健寢疾庚辰平昌王菁勒兵入東宮將殺

太子生而自立時生侍疾西宮菁以爲健已卒攻東掖門健聞

變登端門陳兵自衛衆見健惶懼皆捨仗逃散健執菁數而殺

之餘無所問壬午以大司馬武都王安都督中外諸軍事甲申
健引太師魚遵丞相雷弱兒太傅毛貴司空王墮尚書令梁楞
左僕射梁安右僕射段純吏部尚書辛牢等受遺詔輔政健謂
太子生曰六夷酋帥及大臣執權者若不從汝命宜漸除之

臣光曰顧命大臣所以輔導嗣子爲之翼翼也爲之翼翼而
教使翦之能無斃乎知其不忠則勿任而已矣任以大柄又從
而猜之鮮有不召亂者也

乙酉健卒謚曰景明皇帝廟號

高祖丙戌太子生即位大赦改元壽光羣臣奏曰未踰年而改
元非禮也生怒窮推議主得右僕射段純殺之 秋七月以吏
部尚書周閔爲左僕射 或告會稽王昱曰武陵王第中大脩
器仗將謀非常昱以告太常王彪之彪之曰武陵王之志盡於
馳騁畋獵而已耳深願靜之以安異同之論勿復以爲言昱善

之 秦主生尊母彊氏曰皇太后立妃梁氏爲皇后梁氏安之
女也以其嬖臣太子門大夫南安趙韶爲右僕射太子舍人趙
誨爲中護軍著作郎董榮爲尚書 涼王祚淫虐無道上下怨
憤祚惡河州刺史張瓘之彊遣張掖太守索孚代瓘守抱罕使
瓘討叛胡又遣其將易揣張玲帥步騎萬三千以襲瓘張掖人
王鸞知術數言於祚曰此軍出必不還涼國將危并陳祚三不
道祚大怒以鸞爲詖言斬以徇鸞臨刑曰我死軍敗於外王死
於內必矣祚族滅之瓘聞之斬孚起兵擊祚傳檄州郡廢祚以
侯還第復立涼寧侯曜靈易揣張玲軍始濟河瓘擊破之揣等
單騎奔還瓘軍躡之姑臧振恐驍騎將軍敦煌宋混兄脩與祚
有隙懼禍八月混與弟澄西走合衆萬餘人以應瓘還向姑臧祚
遣楊秋胡將曜靈於東苑拉其輿而殺之埋於沙阬謚曰哀公

秦王生封衛大將軍黃眉爲廣平王前將軍飛爲新興王皆素所善也徵大司馬武都王安領太尉以晉王柳爲征東大將軍并州牧鎮蒲坂魏王廋爲鎮東大將軍豫州牧鎮陝城中書監胡文中書令王魚言於生曰比有星孛于大角熒惑入東并大角帝坐東并秦分於占不出三年國有大喪大臣戮死願陛下脩德以攘之生曰皇后與朕對臨天下可以應大喪矣毛太傅梁車騎梁僕射受遺輔政可以應大臣矣九月生殺梁后及毛貴梁楞梁安貴后之舅也右僕射趙韶中護軍趙誨皆洛州刺史俱之從弟也有寵於生乃以俱爲尚書令俱固辭以疾謂韶誨曰汝等不復顧祖宗欲爲滅門之事毛梁何罪而誅之吾何功而代之汝等可自爲吾其死矣遂以憂卒涼宋混軍于武始大澤爲曜靈發哀閏月混軍至姑臧涼王祚收張瓘弟琚

及子嵩將殺之琚嵩聞之募市人數百揚言張祚無道我兄大軍已至城東敢舉手者誅三族遂開西門納混兵領軍將軍趙長等懼罪入閣呼張重華母馬氏出殿立涼武侯玄靚爲主易揣等引兵入殿收長等殺之祚案劍殿上大呼叱左右力戰祚素失衆心莫肯爲之鬪者遂爲兵人所殺混等梟其首宣示内外暴尸道左城內咸稱萬歲以庶人禮葬之并殺其二子混琚上玄靚爲大將軍涼州牧西平公赦境內復稱建興四十三年時玄靚始七歲張瓘至姑臧推玄靚爲涼王自爲使持節都督中外諸軍事尚書令涼州牧張掖郡公以宋混爲尚書僕射隴西人李儼據郡不受瓘命用江東年號衆多歸之瓘遣其將牛霸討之未至西平人衛緄亦據郡叛霸兵潰奔還瓘遣弟琚擊緄敗之酒泉太守馬基起兵以應緄瓘遣司馬張姚王國擊斬

之 冬十月以豫州刺史謝尚督并冀幽三州鎮壽春 鎮北
將軍段龕與燕主雋書抗中表之儀非其稱帝雋怒十一月以
太原王恪爲大都督撫軍將軍陽騫副之以擊龕 秦以辛牢
守尚書令趙韶爲左僕射尚書董榮爲右僕射中護軍趙誨爲
司隸校尉 十二月高句麗王釗遣使詣燕納質修貢以請其
母燕主雋許之遣殿中將軍刁龕送釗母周氏歸其國以釗爲
征東大將軍營州刺史封樂浪公王如故 上黨人馮騫逐燕
太守段剛據安民城自稱太守遣使來降 秦丞相雷弱兒性
剛直以趙韶董榮亂政每公言於朝見之常切齒韶榮譖之於
秦主生生殺弱兒及其九子二十七孫於是諸羌皆有離心生
雖在諒陰遊飲自若彎弓露刃以見朝臣錘鉗鋸鑿可以害人
之具備置左右即位未幾后妃公卿已下至于僕隸凡殺五百

餘人截脰拉脅鋸項剝胎者比比有之

燕王雋以段龕方彊

謂太原王恪曰若龕遣軍拒河不得度者可直取呂護而還恪分遣輕軍先至河上具舟楫以觀龕志趣龕弟羅驍勇有智謀言於龕曰慕容恪善用兵加之衆盛若聽其濟河進至城下恐雖乞降不可得也請兄固守羅帥精銳拒之於河幸而戰捷兄帥大衆繼之必有大功若其不捷不若早降猶不失爲千戶侯也龕不從羅固請不已龕怒殺之

十二年春正月燕太原王恪引兵濟河未至廣固百餘里段龕帥衆三萬逆戰丙申恪大破龕於淄水執其弟欽斬右長史袁範等齊王友辟閭蔚被創恪聞其賢遣人求之蔚已死士卒降者數千人龕脫走還城固守恪進軍圍之秦司空王墮性剛峻右僕射董榮侍中強國皆以佞幸進墮疾之如讎每朝見榮

未嘗與之言或謂墮曰董君貴幸無比公宜小降意接之墮曰
董龍是何雞狗而令國士與之言乎會有天變榮與強國言於
秦主生曰今天譴甚重宜以貴臣應之生曰貴臣唯有大司馬
及司空耳榮國曰大司馬國之懿親不可殺也乃殺王墮將刑
榮謂之曰今日復敢比董龍於雞狗乎墮瞋目叱之洛州刺史
杜郁墮之甥也左僕射趙韶惡之譖於生以爲貳於晉而殺之
壬戌生宴羣臣於太極殿以尚書令辛牢爲酒監酒酣生怒曰
何不彊人酒而猶有坐者引弓射牢殺之羣臣懼莫敢不醉偃
仆失冠生乃悅 匈奴大人劉務栢卒弟開頭立將貳於代二
月代王什翼犍引兵西巡臨河關頭懼請降 燕太原王恪招
撫段龕諸城己丑龕所署徐州刺史陽都公王騰舉衆降恪命
騰以故職還屯陽都 秦征東大將軍晉王柳遣參軍閻負梁

通鑑一百一十五
殊使於涼以書說涼王玄靚負殊至姑臧張瓘見之曰我晉臣也臣無境外之交二君何以來辱負殊曰晉王與君鄰藩雖山河阻絕風通道會故來修好君何怪焉瓘曰吾盡忠事晉於今六世矣若與苻征東通使是上違先君之志下墮士民之節其可乎負殊曰晉室衰微墜失天命固已久矣是以涼之先王北面二趙唯知機也今大秦威德方盛涼王若欲自帝河右則非秦之敵欲以小事大則曷若捨晉事秦長保福祿乎瓘曰中州好食言嚮者石氏使車適返而戎騎已至吾不敢信也負殊曰自古帝王居中州者政化各殊趙爲姦詐秦敦信義豈得一槩待之乎張先揚初皆阻兵不服先帝討而擒之赦其罪戾寵以爵秩固非石氏之比也瓘曰必如君言秦之威德無敵何不先取江南則天下盡爲秦有征東何辱命焉負殊曰江南文身之

俗道汚先叛化隆後服主上以爲江南必須兵服河右可以義
懷故遣行人先申大好若君不達天命則江南得延數年之命
而河右恐非君之土也瓘曰我跨據三州帶甲十萬西苞葱嶺
東距大河伐人有餘況於自守何畏於秦負殊曰貴州山河之
固孰若崤函民物之饒孰若秦雍杜洪張琚因趙氏成資兵彊
財富有囊括關中席卷四海之志先帝戎旗西指冰消雲散旬
月之間不覺易主主上若以貴州不服赫然奮怒控弦百萬鼓
行而西未知貴州將何以待之瓘笑曰茲事當決之於王非身所
了負殊曰涼王雖英睿夙成然年在幼沖君居伊霍之任國家
安危繫君一舉耳瓘懼乃以立靚之命遣使稱藩於秦秦因立
靚所稱官爵而授之將軍劉度攻秦青州刺史王朗于盧氏
燕將軍慕容興長卿入軹關攻秦幽州刺史彊哲于裴氏堡秦主

生遣前將軍新興王飛拒度建節將軍鄧羌拒長卿飛未至而度退羌與長卿戰大破之獲長卿及甲首二千餘級 桓溫請移都洛陽修復園陵章十餘上不許拜溫征討大都督督司冀二州諸軍事以討姚襄 三月秦主生發三輔民治渭橋金紫光祿大夫程肱諫以爲妨農生殺之 夏四月長安大風發屋拔木秦宮中驚擾或稱賊至宮門晝閉五日乃止秦主生推告賊者剗出其心左光祿大夫強平諫曰天降災異陛下當愛民事神緩刑崇德以應之乃可弭也生怒鑿其頂而殺之衛將軍廣平王黃眉前將軍新興王飛建節將軍鄧羌以平太后之弟叩頭固諫生弗聽出黃眉爲左馮翊飛爲右扶風羌行咸陽太守猶惜其驍勇故皆弗殺五月太后強氏以憂恨卒謚曰明德姚襄自許昌攻周成于洛陽 六月秦主生下詔曰朕受皇

天之命君臨萬邦嗣統已來有何不善而謗譴之音扇滿天下
殺不過千而謂之殘虐行者比肩未足爲希方當峻刑極罰復
如朕何自去春以來潼關之西至于長安虎狼爲暴晝則繼道
夜則發屋不食六畜專務食人凡殺七百餘人民廢耕桑相聚
邑居而爲害不息秋七月秦群臣奏請禳災生曰野獸飢則食
人飽當自止何禳之有且天豈不愛民哉正以犯罪者多故助
朕殺之耳 丙子燕獻懷太子曄卒 姚襄攻洛陽踰月不克
長史王亮諫曰明公英名蓋世兵彊民附今頓兵堅城之下力
屈威挫或爲它寇所乘此危亡之道也襄不從栢溫自江陵北
伐遣督護高武據魯陽輔國將軍戴施屯河上自帥大兵繼進
與寮屬登平乘樓望中原歎曰遂使神州陸沈百年丘墟王夷
甫諸人不得不任其責記室陳郡袁宏曰運有興廢豈必諸人

之過溫作色曰昔劉景升有千斤大牛噉芻豆十倍於常牛負重致遠曾不若一羸特魏武入荊州殺以享軍八月己亥溫至伊水姚襄撤圍拒之匿精銳於水北林中遣使謂溫曰承親帥王師以來襄今奉身歸命願敕三軍小却當拜伏路左溫曰我自開復中原展勸山陵無豫君事欲來者便前相見在近何煩使人襄拒水而戰溫結陳而前親被甲督戰襄衆大敗死者數千人襄帥麾下數千騎奔于洛陽北山其夜民棄妻子隨襄者五千餘人襄勇而愛人雖戰屢敗民知襄所在輒扶老攜幼奔馳而赴之溫軍中傳言襄病創已死許洛士女爲溫所得者無不北望而泣襄西走溫追之不及弘農楊亮自襄所來奔溫問襄之爲人亮曰襄神明器宇孫策之儔而雄武過之周成帥衆出降溫屯故太極殿前旣而徙屯金墉城己丑謁諸陵有毀壞者

修復之各置陵今表鎮西將軍謝尚都督司州諸軍事鎮洛陽以尚未至留潁川太守毛穆之督護陳午河南太守戴施以二千人戍洛陽衛山陵徙降民三千餘家於江漢之間執周成以歸姚襄奔平陽秦并州刺史尹赤復以衆降襄襄遂據襄陵秦大將軍張平擊之襄爲平所敗乃與平約爲兄弟各罷兵段龕遣其屬段蕙來求救詔徐州刺史荀羨將兵隨蕙救之羨至琅邪憚燕兵之彊不敢進王騰寇鄆城羨進攻陽都會霖雨城壞獲騰斬之冬十月癸巳朔日有食之秦主生夜食棗多旦而有疾召太醫令程延使診之延曰陛下無它疾食棗多耳生怒曰汝非聖人安知吾食棗遂斬之燕大司馬恪圍段龕於廣固諸將請急攻之恪曰用兵之勢有宜緩者有宜急者不可不察若彼我勢敵外有彊援恐有腹背之患則攻之不可不